

## **DONOSTIAKO HONDARTZETAKO SOROSLEEK EGINDAKO ESKAERAREN** **INGURUKO KONTROL MOZIOA**

Olaia Duarte Lopezek, EH BILDU udal taldeko zinegotziak, Udaltzatzen Organo Araudiaren 98. artikulua oinarri, mozio hau aurkezten du Udaltzatzen azter dadin. Mozioa apirilaren 11n Gune Publikoen Batzordean aztertutako interpelazioaren ondorioa da.

### **JUSTIFIKAZIOA**

Martxoaren 15ean *paddle surf* egiten ari zen estatubatuar bat hil ondoren, Zurriolako hondartzako segurtasunari buruzko eztabaida areagotu egin da. Hainbat ahots altxatu dira azken egunotan, baita hildako surflariaren omenaldian ere –martxoaren 20an-, segurtasun neurriak eskatuz, eta Donostiako hondartzetako sorosleek idatzi bat erregistratu dute martxoaren 28an Udalean, sorosle-zerbitzua hilabete gehiago zabaltzeko eskatuz.

Izan ere, Zurriolako hondartzako sorosle zein surflariak oso ondo dakite zertaz ari diren. Gaur egun, haiek dira taldeka antolatzen direnak, boluntario moduan, segurtasuna bermatzen saiatzeko Udalak sorosleen zerbitzu publikoa ezartzen ez duen hilabete guztietan. Adibidez, jakinarazi digute 2021eko apirilean, Aste Santuko oporretan, 16 esku-hartze egin zituztela arriskuan zeuden surflariak eta bainulariak salbatzeko. Udalean erregistratu duten idatzian ere hainbat datu aipatzen dituzte, segurtasun gehiagoren beharra justifikatuz.

Jakina denez, Zurriolako hondartza EAEko erakunde guztietatik gehien sustatu den hondartzetako bat da, eta esan daiteke azken urteotan turismo-saturaziora ere iritsi dela. Donostia Turismoa eta Donostiako Sustapena udal sozietate publikoek hondartza horren erabilera bultzatzen dute Donostiako Surf City Klusterraren babespean, eta gaur egun Donostia da Surfeko Hirien Nazioarteko Sarearen buru, eta haren jarduerak eta ekitaldiak koordinatzen ditu.

Hala ere, surfaren sustapenari dagokionez, eskaintzen diren segurtasun eta babes zerbitzuak ez datoz bat aktibitatearen eta beste hondartza kirolen sustapen-maila horrekin. Horrek guztiak Zurriola, surflarien hitzetan, surfean aritzeko «hondartzarik ez-seguruenetako bat» bihurtu du.

Aitzitik, Donostiatik hurbil surfa eta hondartzak asko sustatu dituzten hiriak ditugu, baina modu koherentean salbamendu-zerbitzuak egokitu dituztenak. Horren adibide da Biarritz, non bertako sei hondartzetan erabilera eta arriskuak aztertu ondoren, sorospen-ordutegiak egokitu diren; hiru hondartzetan udako ordutegia mantentzen da, ekainetik irailera, eta beste hiruetan sorospen-zerbitzua egokitu egin da, eta maiatzetik urrira zabaldu da, bakoitzaren erabileraren eta surfaren inguruan egindako sustapenaren arabera.

Surflarien eta erabiltzaileen eskaeren aurrean, Eneko Goia alkateak berriki adierazi du «oso zail» ikusten duela sorosleen zerbitzua bermatzea, eta «erantzukizun indibiduala» eskatu du surfa egiteko garaian.

Apirileko batzordeetan, Udal Gobernuko delegatuak ere antzeko erantzuna eman zuen, erakundeen erantzukizunaren aurretik edozein kirol egiten duten pertsonen erantzukizuna jarritz

**EH Bildu talde politikoa**  
**Grupo político EH Bildu**

Ijentea, 1 - Tel. 943481027 - [www.donostia.ehbildu.eus](http://www.donostia.ehbildu.eus) -  
20003 Donostia

eta Udalaren hobekuntzak kartelak, seinaleak eta korronteen oharrak areagotzera mugatuz. Bestalde, interpelazioan egindako hiru galderak erantzunik gabe gelditu ziren (aurrekontua, diagnostikoa, etab.).

Ulertezina da Udal Gobernuak sorosleen zerbitzua ez ezartzeko erakutsi duen egoskorkeria; batez ere, kontuan izanda zerbitzua eskaintzen duten profesionalek datuetan oinarritutako zazpi hilabeteko zerbitzua eskatzen dutenean, gaur egungoa, lau hilabetekoa, motz gelditzen baita.

Azaldutako egoera kontuan hartuta, behean sinatzen duen zinegotziak honako MOZIO hau aurkezten du:

### **KONTROL MOZIOA**

- 1.- Udalbatzak hertsatuki eskatzen dio Udal Gobernuari Udalak eskaintzen duen zaintza, salbamendu eta laguntza zerbitzuko profesionalekin bilera bat egin dezala, Zurriolako hondartzaren egoeraren diagnostiko partekatua egiteko eta zerbitzua hobetzeko aukerak proposatzeko.
- 2.- Udalbatzak hertsatuki eskatzen dio Udal Gobernuari behar diren kudeaketak egin ditzala Donostiak salbamendu profesionaleko talde bat izan dezan udako denboralditik kanpora salbamendu lanak behar bezala eta azkartasunez egin daitezen.
- 3.- Udalbatzak hertsatuki eskatzen dio Udal Gobernuari 2023an froga pilotu bat egin dezala Zurriolako hondartzan, zaintza, salbamendu eta laguntza zerbitzua apiriletik urrira eskainiz.

Donostian, 2022ko apirilaren 22an

Olaia Duarte López  
**EH Bildu udal taldeko zinegotzia**